



Møtebok for Formannskapet i Radøy

Møtedato: 25.01.2018
Møtested: Kommunestyresalen
Møtetid: 09.00

Møtedeltakarar	Parti	Rolle
Jon Askeland	SP	Ordførar
Jostein Borlaug	AP	Varaordførar
Anne Berit Bø Palmesen	SP	Medlem
Kirsti Gjetle Floen	AP	Medlem
Else Marie Skartveit Dale	KRF	Medlem
Kenneth Taule Murberg	H	Medlem
Vidar Grindheim	H	Varamedlem

Forfall	Parti	Møtande varamedlem
Christel Villanger Håland	H	Vidar Grindheim - H

Andre møtande: Rådmann Jarle Landås, kommunalsjef Lisbeth Alvær i sak 11, kommunalesjef Mette Fauskanger i sak 11, økonomisjef Sveinung Kvamme i sak 8, leiar teknisk forvaltning Tonje N. Epland i sak 11, møtesekretær Arthur Kleiveland

Underskrifter:

Jon Askeland
Ordførar

Arthur Kleiveland
møtesekretær

Sakliste

Saknr	Tittel
001/2018	Suppleringsval - generalforsamlinga i Aufera AS
002/2018	Suppleringsval til styret i Sambandet Vest
003/2018	Søknad om fritak politiske verv
004/2018	Søknad om fritak varamedlem kommunestyre
005/2018	Tilskot til 17. mai-komiteane
006/2018	Bogatunet - tilsyn og dekking av løpande utgifter
007/2018	Prosjektmandat for småbarnsavdeling ved Austebygd barnehage
008/2018	Retningslinjer for næringsfond - vurdering
009/2018	Rullering av ROS-analyse - 2018
010/2018	Mulighetsstudie Manger rådhus og Prestegarden
011/2018	Meldingar og referatsaker
012/2018	Serveringsløyve - Pizzeria Manger Kadir Yildiz

Radøy kommune

Saksframlegg

Saknr	Utval	Type	Dato
001/2018	Formannskapet i Radøy	PS	25.01.2018
	Kommunestyret i Radøy	PS	

Sakshandsamar	Arkivsaknr.:	Dokumentnr.:
Arthur Kleiveland	16/1497	18/1029

Suppleringsval - generalforsamlinga i Aufera AS

Saksopplysingar:

Bakgrunn

Morgan Taule har takka ja til stilling som ny dagleg leiar i Knarvik Industri og Miljø (KIM). Han tek til i stillinga 1. februar 2018.

Taule er valt som Radøy kommune sitt medlem i generalforsamlinga i AUFERA AS, som Radøy eig saman med nabokommunane Austrheim og Fedje.

Knarvik Industri og Miljø og AUFERA AS vil vera konkurrentar på enkelte område, og Taule finn det naturleg at han går ut av generalforsamlinga i AUFERA.

Det må det gjerast suppleringsval på medlem til generalforsamlinga i AUFERA.

Det er formannskapet som valnemnd som kjem med innstilling til kommunestyret.

Konklusjon

Formannskapet som valnemnd oppnemner nytt medlem til generalforsamlinga i AUFERA for Morgan Taule.

Formannskapet i Radøy - 001/2018

FS - handsaming:

Arbeidarpartiet sette fram følgjande framlegg:

Jostein Borlaug vert valt som Radøy kommune sin representant i generalforsamlinga i Aufera as etter Morgan Taule.

Formannskapet (som valnemnd) vedtok framlegg til suppleringsval til generalforsamlinga i Aufera.

FS - vedtak:

Jostein Borlaug vert valt som representant til generalforsamlinga i Aufera as.

Vedlegg:

Morgan Taule - suppleringsval

Radøy kommune

Saksframlegg

Saknr	Utval	Type	Dato
002/2018	Formannskapet i Radøy	PS	25.01.2018
	Kommunestyret i Radøy	PS	

Sakshandsamar	Arkivsaknr.:	Dokumentnr.:
Arthur Kleiveland	16/1497	18/965

Suppleringsval til styret i Sambandet Vest

Saksopplysingar:

Bakgrunn

Jon Askeland er vara for Kenneth Taule Murberg i styret for Sambandet Vest. Ordførar Jon Askeland bed om at det vert halde suppleringsval og at formannskapet som valnemnd oppnemner ny vara for Kenneth Taule Murberg.

Konklusjon

Formannskapet som valnemnd oppnemner vara til styret for Sambandet vest

Formannskapet i Radøy - 002/2018

FS - handsaming:

Jon Askeland forklarte utfordringa knytt til ugildskap i styret i Sambandet Vest, ettersom han også representerer kommunen i eigarmøta i aksjeselskapet.

Det vart sett fram følgjande framlegg til vedtak:

John Bauge vert valt som ny varamedlem til styret i Sambandet Vest.

Formannskapet som valnemnd vedtok framlegg sett fram i møtet.

FS - vedtak:

John Bauge vert valt som ny varamedlem til styret i Sambandet Vest.

Radøy kommune

Saksframlegg

Saknr	Utval	Type	Dato
003/2018	Formannskapet i Radøy	PS	25.01.2018
	Kommunestyret i Radøy	PS	

Sakshandsamar	Arkivsaknr.:	Dokumentnr.:
Arthur Kleiveland	16/1497	18/82

Søknad om fritak politiske verv

Saksopplysingar:

Bakgrunn

Liv Berith Rath søker om fritak frå sine politiske verv i Radøy. Bakgrunnen for søknaden er at ho skal flytta frå kommunen. Ho søker om fritak frå 1.1. 2018 og ut denne valperioden.

Liv Berith Rath representerer Arbeidarpartiet og har i denne perioden (2015-2019) følgjande verv i Radøy kommune:

- medlem i kommunestyret
- medlem i hovudutval for plan, landbruk og teknisk
- medlem i underutval for vilt og innlandsfiske
- 1. varamedlem til samarbeidsutval/skulemiljøutval ved Sæbø skule
- 3. varamedlem til representantskapet i Driftsassistanse – Hordaland Vann og avløp IKS

Ved flytting ut av kommunen skal vedkomande tre ut av sine verv – jfr KommuneLOVA § 15 nr 1.

Når eit medlem i kommunestyret går ut, vil varamedlem frå vedkomande gruppe automatisk gå inn i vedkomande sin stad. I dette tilfellet betyr det at Ann Christin Hoen (AP) dermed vil rykkja opp frå 1. varaplass til fast medlem i kommunestyret etter Liv Berith Rath.

Nytt medlem etter Rath i hovudutvalet skal veljast gjennom suppleringsval, sjølv om det er valt varamedlem. Vedkomande skal veljast frå same gruppe som den som trer ut av utvalet.

Det skal også gjerast suppleringsval i verva som 1. varamedlem til samarbeidsutval/skulemiljøutval ved Sæbø skule og 3. varamedlem til representantskapet i Driftsassistanse – Hordaland Vann og avløp IKS.

Kommunestyret skal avgjera søknaden om fritak, og skal også gjera suppleringsval. Det er formannskapet som valnemnd som kjem med innstilling til kommunestyret.

Rådmannen sitt framlegg til vedtak:

Søknad om fritak frå politiske verv vert innvilga jfr KommuneLOVA § 15 nr.1
Formannskapet som valnemnd legg fram si innstilling til suppleringsval.

Formannskapet i Radøy - 003/2018

FS - handsaming:

Formannskapet vedtok å innvilga søknaden frå Liv Berith Rath om fritak frå politiske verv.

Ann Christin Hoen rykkjer automatisk opp som fast medlem for Ap i kommunestyret.

Arbeidarpartiet sette fram følgjande framlegg til suppleringsval:

- Jannicke Helland vert valt som nytt medlem i hovudutval for plan, landbruk og teknisk
- Jostein Borlaug vert valt som nytt 1. varamedlem til samarbeidsutvalet ved Sæbø skule
- Jannicke Helland vert valt som 3. varamedlem til representantskapet i Driftsassistanse – Hordaland Vann og avløp IKS

Hovudutvalet gjer sjølv suppleringsval til underutvalet for vilt og innlandsfiske.

Formannskapet innvilga søknad frå Liv Berith Rath om fritak frå politiske verv. Formannskapet som valnemnd vedtok framlegg til suppleringsvedtak sett fram i møtet.

FS - vedtak:

Liv Berith Rath får innvilga søknad om fritak frå politiske verv i Radøy kommune.

- Jannicke Helland vert valt som nytt medlem i hovudutval for plan, landbruk og teknisk
- Jostein Borlaug vert valt som nytt 1. varamedlem til samarbeidsutvalet ved Sæbø skule
- Jannicke Helland vert valt som 3. varamedlem til representantskapet i Driftsassistanse – Hordaland Vann og avløp IKS

Vedlegg:

Søknad om fritak for politiske verv - Liv Berith Rath

Radøy kommune

Saksframlegg

Saknr	Utval	Type	Dato
004/2018	Formannskapet i Radøy	PS	25.01.2018
	Kommunestyret i Radøy	PS	

Sakshandsamar	Arkivsaknr.:	Dokumentnr.:
Arthur Kleiveland	16/1497	18/1049

Søknad om fritak varamedlem kommunestyre

Saksopplysingar:

Bakgrunn

I kommunestyresak 074/2016 vart Frode Hervik innvilga permisjon for perioden fram til 01.02.2018 og Agnes Hoshovde Bernes rykka opp som fast representant i kommunestyre. Varalista til Venstre vart i same sak supplert med Ingvild Brattetaule som nytt 5. varamedlem. Ingvild Brattetaule søker no om fritak frå dette vervet for resten av perioden på grunn av studier i Trondheim.

Rådmannen sitt framlegg til vedtak:

Ingvild Brattetaule får fritak for sitt verv som 5. vara på Venstre si varaliste til kommunestyret.

Formannskapet i Radøy - 004/2018

FS - handsaming:

Formannskapet innvilgar Ingvild Brattetaule sin søknad om fritak frå verv som 5. vara på Venstre si varaliste til kommunestyret.

Formannskapet meiner det ikkje er behov for å gjera suppleringsval.

FS - vedtak:

Ingvild Brattetaule får fritak for sitt verv som 5. vara på Venstre si varaliste til kommunestyret.

Vedlegg:

Søknad om fritak frå politisk verv - Ingvild Brattetaule

Radøy kommune

Saksframlegg

Saknr	Utval	Type	Dato
005/2018	Formannskapet i Radøy	PS	25.01.2018

Sakshandsamar	Arkivsaknr.:	Dokumentnr.:
Bente Kopperdal Hervik	18/132	18/898

Tilskot til 17. mai-komiteane

Saksopplysingar:

Bakgrunn

I Radøy kommune er det 17. mai-arrangement i alle dei fire skulekrinsane. Dette er store og viktige arrangement som krev mykje førebuing og stor dugnadsinnsats frå arrangørane. I budsjettet for 2017 er det sett av kr 50 000 i tilskot til 17. mai-nemndene. Administrasjonen er beden om å utarbeida retningslinjer for tildeling.

Vurdering

17. mai-arrangementa er blant dei største og mest arbeidskrevjande arrangementa som vert gjennomført kommunen. I alle skulekrinsane er det no foreldra til elevar i barneskulane som har tatt på seg å planlegga og gjennomføra arrangementa.

Midlane som er sett av i budsjettet kan fordelast på fleire ulike måtar. Ein kan til dømes fordela midlar etter søknad, ein kan fordela midlar likt på dei fire krinsane, ein kan fordela på innbyggjartal i skulekrinsane, elevtal på skulane eller tal på grunnskuleelevar i krinsen.

Storleiken på dei ulike arrangementa varierer veldig mellom dei ulike skulekrinsane. Rådmannen meiner at den beste måten å fordela midlane på er å ta utgangspunkt i elevtalet på skulane. Då det er foreldra/FAU som er arrangør ved alle grunnskulane vil elevtalet på skulane langt på veg gjenspeglar kor mange personar som er med og arbeider dugnad for å gjennomføra arrangementet. Denne måten å fordela midlar er også enkel å administrera og føreseieleg for 17. mai-komiteane.

Ved å ta utgangspunkt i elevtal ved barneskulane får me følgjande oppsett:

	Tal elevar	Prosent av elevtal totalt	Utrekna tilskot
Austebygd skule	46	11,2	5 600
Hordabø skule	99	24,2	12 100
Manger skule	172	42,1	21 050
Sæbø skule	92	22,5	11 250
Totalt	409	100	50000

Denne måten å fordela midlane på gjenspeglar ikkje inntekter og utgifter til dei ulike komiteane. Rådmannen meiner at ei fordeling av midlar som tar utgangspunkt i inntekter og utgifter føregåande år ikkje nødvendigvis vil gje ei meir rettvis fordeling då inntektene og utgiftene kan variera frå år til år på grunn av av mellom anna tal på frammøtte og ulike investeringsbehov frå år til år.

Konklusjon

Storleiken på 17. mai-arrangementa varierer svært mykje mellom skulekrinsane. Rådmannen meiner at den beste måten å fordela tilskotet på er å ta utgangspunkt i elevtalet på barneskulane, då dette i stor grad gjenspeglar kor mange personar dugnaden er fordelt på, og dermed kor mange arbeidstimar som vert lagt ned.

Rådmannen sitt framlegg til vedtak:

Tilskotet på kr 50 000 som i budsjettet for 2018 er sett til fordeling mellom 17. mai-komiteane vert fordelt på følgjande måte:

Austabygd skule	kr 5 600
Hordabø skule	kr 12 100
Manger skule	kr 21 050
Sæbø skule	kr 11 250

Formannskapet i Radøy - 005/2018

FS - handsaming:

Kenneth Taule Murberg (H) sa at forslaget om tilskot til 17. mai-komiteane over 2018-budsjettet var tenkt som ei eingongs-løyving til investering i utstyr. Han peika på at komiteane har lite pengar til å kjøpa inn nytt utstyr.

Formannskapet slutta seg til dette prinsippet for tildeling av midlar til 17. mai-komiteane. Denne løyvinga gjeld for 2018. Dersom ei tilsvarande løyving skal gjevast i 2019, må det vedtakast i budsjettet for 2019.

På bakgrunn av ordsiftet sette ordførar Jon Askeland fram følgjande tilleggsframlegg:

Det blir sett inn følgjande tilleggspunkt før rådmannen sitt framlegg:

Midlane til 17. mai-nemndene er ei eingongsløyving som skal brukast til kjøp av nødvendig utstyr til 17. mai-arrangement.

Etter rådmannen sitt framlegg vert det sett inn følgjande tilleggspunkt:

Løyvinga vil verta utbetalt etter framviste kvitteringar.

Formannskapet vedtok samrøystes rådmannen sitt framlegg til vedtak, med tilleggsframlegg sett fram i møtet.

FS - vedtak:

Midlane til 17. mai-nemndene er ei eingongsløyving som skal brukast til kjøp av nødvendig utstyr til 17. mai-arrangement.

Tilskotet på kr 50 000 som i budsjettet for 2018 er sett til fordeling mellom 17. mai-komiteane vert fordelt på følgjande måte:

Austabygd skule	kr 5 600
Hordabø skule	kr 12 100
Manger skule	kr 21 050
Sæbø skule	kr 11 250

Løyvinga vil verta utbetalt etter framviste kvitteringar.

Radøy kommune

Saksframlegg

Saknr	Utval	Type	Dato
006/2018	Formannskapet i Radøy	PS	25.01.2018

Sakshandsamar	Arkivsaknr.:	Dokumentnr.:
Bente Kopperdal Hervik	17/1720	18/1045

Bogatunet - tilsyn og dekking av løpande utgifter

Saksopplysingar:

Bakgrunn

Kommunestyret gjorde i møte 060/2016 27. oktober 2016 vedtak om at kommunen skulle overta Bogatunet og Syltastova. Av ulike grunnar har gjennomføringa av dette vedtaket dratt ut i tid, og det er framleis Nord- og Midhordland som er eigar av desse bygga. Nord- og Midhordland sogelag har per i dag ingen inntekter, og kapitalen er brukt opp slik at dei ikkje lenger har midlar til å dekkja utgifter vedlikehald og faste utgifter. Dei har difor retta ein førespurnad til kommunen om å få dekkja midlar til desse utgiftene.

Vurdering

Nord- og Midhordland sogelag har sidan 1920-talet vore eigar av Bogatunet og Syltastova. Den gongen var laget eit sogelag for heile Nord- og Midhordlandsregionen. Laget hadde ein aktiv medlemsmasse, dei gav ut årboka *Frå Fjon til Fusa* og som gav laget inntekter og i tillegg tok dei på seg eigarskapen for Bogatunet og Syltastova for å redde bygga.

Dei siste åra har laget slitt med rekrutteringa, og utgjevinga av heftet *Frå Fjon til Fusa* har stoppa opp, og det einaste som er att av aktivitet i laget er at styret forvaltar eigarskapen av Bogatunet og Syltastova. På bakgrunn av dette har laget bede kommunen overta bygga, noko kommunen har fatta vedtak om, men som har tatt langt lenger tid å gjennomføra enn venta.

Kommunen har siste året hatt jamleg tilsyn med bygga, og kommunen har også tatt på seg å organisera å halda ope faste dagar om sommaren og dekkja utgifter til dette. I budsjettet for 2018 er det sett av midlar til drift av Bogatunet og Syltastova. Rådmannen meiner at kommunen bør dekkja faste utgifter, og ta seg av løpande naudsynt vedlikehald på Bogatunet og Syltastova fram til eigarskapen er oppgjort innanfor rammene av avsette midlar i budsjettet for 2018. Om kommunen ikkje gjer dette vil ein risikera at forsikringar ikkje vert betalt, at straumen på Bogatunet vert stengt og at bygga vert ståande utan tilsyn og vedlikehald.

Konklusjon

Rådmannen rår til at kommunen tar seg av tilsyn og løpande utgifter til vedlikehald av Bogatunet og Syltastova innanfor rammene av avsette midlar til budsjettet for 2018 fram til eigarskapen for bygga er oppgjort.

Rådmannen sitt framlegg til vedtak:

Radøy kommune tar på seg ansvar for tilsyn, og dekkjer løpande utgifter til vedlikehald, forsikring og straum for Bogatunet og Syltastova innanfor rammene på avsette midlar i budsjettet for 2018.

Formannskapet i Radøy - 006/2018

FS - handsaming:

Ordførar Jon Askeland orienterte om status for eigartilhøva for Bogatunet og Syltastova. Radøy kommune har frå Nord- og Midhordland sogelag fått tilbod om å overta dei to kulturhistoriske bygningane for ein symbolsk pris. Ordføraren peika på at kommunestyrevedtaket i sak 060/2016 om at kommunen skulle takka ja til å overta Bogatunet og Syltastova, så langt ikkje er effektivt.

Ordføraren har i møte med fylkeskonservatoren blitt orientert om at kommunalt eigarskap av slike kulturminne ikkje lenger er det mest vanlege. I staden kan det vera meir aktuelt med ein ideell basert eigarskapsmodell, med kommunen som ein medspelar.

Ordføraren peika på at det t.d. kan vera mogleg å etablera Bogatunet- / Syltastovas Venner, som kommunen kan inngå ein samarbeidsavtale om drift med. Dersom kommunen skulle stå som eigar av desse kulturminna, vil det ikkje vera mogleg å søkja midlar frå offentlege instansar til t.d. vedlikehald.

Ordføraren vil informera om status for eigarskap for Bogatunet/Syltastova i meldingsak i neste kommunestyre, og fekk tilslutning i formannskapet for dette.

Formannskapet vedtok rådmannen sitt framlegg til vedtak.

FS - vedtak:

Radøy kommune tar på seg ansvar for tilsyn, og dekkjer løpande utgifter til vedlikehald, forsikring og straum for Bogatunet og Syltastova innanfor rammene på avsette midlar i budsjettet for 2018.

Radøy kommune

Saksframlegg

Saknr	Utval	Type	Dato
007/2018	Formannskapet i Radøy	PS	25.01.2018

Sakshandsamar	Arkivsaknr.:	Dokumentnr.:
Lisbeth Toppe Alvær	18/20	18/1006

Prosjektmandat for småbarnsavdeling ved Austebygd barnehage

Saksopplysingar:

Bakgrunn

Prosjektmandatet for utbygging av Austebygd barnehage gjer m.a. greie for mål, organisering og finansiering, og legg rammene for realisering av prosjektet. Framdriftsplan vert utarbeidd av prosjektgruppa, og rapportering skal skje i tråd med avtale. Prosjektmandatet er lagt ved saka.

Investeringsprosjekt som gjeld nybygg og ombyggingar, inkludert VA-prosjekt, med kostnadsramme som hovudregel 1 millionar kroner eller over, er i følgje politisk reglement pkt 6b, prosjekt kor byggenemnda skal koblast inn. I det politiske reglementet heiter det at byggenemnda skal ha ein innspel-, støtte- og pådrivarfunksjon i prosjektgjennomføringa. Byggenemnda får oppdraga sine frå kommunestyret eller formannskapet gjennom godkjenning av prosjektmandat.

Vurdering

Prosjektmandatet for utbygging av Austebygda barnehage følger opp budsjettet på ein tilfredstillande måte, og legg rammene for realisering av småbarnsavdeling. Prosjektet er eit utbyggingsprosjekt med ein total kostnadsramme på kr 6 500 000, og fell derfor innanfor portefølgjen som skal følgast opp av byggenemnda.

Konklusjon

Prosjektmandatet følger opp budsjettvedtaket for utbygging av Austebygd barnehage, og prosjektet fell innanfor oppdragsområdet for byggenemnda.

Rådmannen sitt framlegg til vedtak:

Formannskapet godkjenner prosjektmandatet for utbygging av Austebygd barnehage, og prosjektet vert sendt over til byggenemnda for oppfølging.

Formannskapet i Radøy - 007/2018

FS - handsaming:

Rådmann Jarle Landås orienterte om modellen med prosjektmandat for investeringsprosjekt som ligg i vedteke budsjett.

Vidar Grindheim (H) stilte spørsmål om formuleringar knytt til kostnad. Rådmannen svara at utfrå status i dag skal den økonomiske ramma vera tilrekkeleg for å koma i mål.

Formannskapet vedtok samrøystes rådmannen sitt framlegg til vedtak.

FS - vedtak:

Formannskapet godkjenner prosjektmandatet for utbygging av Austebygd barnehage, og prosjektet vert sendt over til byggenemnda for oppfølging.

Vedlegg:

Prosjektmandat - Austebygd barnehage småbarnsavg 170118

POLITISK REGLEMENT og delegering 2016 vedteke i kommunestyret

Radøy kommune

Saksframlegg

Saknr	Utval	Type	Dato
008/2018	Formannskapet i Radøy	PS	25.01.2018

Sakshandsamar	Arkivsaknr.:	Dokumentnr.:
Sveinung Kvamme	17/2237	17/13994

Retningsliner for næringsfond - vurdering

Saksopplysingar:

Bakgrunn

I formannskapssak 033/12 vart det gjort vedtak om retningsliner for næringsfondet, der det går fram at fondet primært skal nyttast til infrastrukturtiltak og tilrettelegging for næringsutvikling med vekt på infrastruktur, planarbeid og utvikling av Manger senter. Det er også opning for tilskot til nødvendige bedriftsutviklingsiltak for verksemder i ein vanskeleg situasjon. Dette er kommunen sine gjeldande retningsliner, noko som også er stadfesta i fylkesmannen sitt brev av 26.10.2017.

I formannskapssak 036/2017 bad formannskapet rådmanen om ei utgreiing om bruk av næringsfondet knytt til infrastruktur i landbruket.

Det kommunale nærings- og infrastrukturfondet er no kr 2.783.400,99, etter utbetaling av tilskot kr 100.000 i samsvar med lovleg vedtak i sak FS 036/2017.

Rådmannen vurderer landbruk som næring, og legg såleis til grunn at næringsfondet i utgangspunktet kan nyttast til infrastrukturtiltak i landbruket.

Spørsmålet vert då om det er trong for presisering eller avgrensing innafor landbruk, i høve til kva typar tiltak som eventuelt kan vurderast for tilskot frå næringsfondet. Etter rådmannen si vurdering vil det måtta gjerast avveging mellom det landbruksfaglege og det næringspolitiske i kvar einskild sak. Rådmannen ser det såleis som vanskeleg å laga klåre avgrensingar i retningslinene. I den grad det måtte koma søknader frå landbruket om tilskot frå næringsfondet, vil rådmannen sikra at også dei landbruksfaglege interessene vert tekne i vare i saksutgreiinga.

Næringsfondet har uansett avgrensa «levetid», i høve til vedteken kommunesamanslåing, og rådmannen legg til grunn at det aller meste av nærings- og infrastrukturfondet vil verta nytta til planarbeid Manger senter og tilrettelegging på Olsvollstranda, for å sikra vidare utbygging av industriområdet.

Konklusjon

Rådmannen legg til grunn at eksisterande retningsliner er tilstrekkelege, også i høve til infrastrukturtiltak i landbruket.

Rådmannen sitt framlegg til vedtak:

Retningslinene for næringsfondet vert ståande uendra, slik dei går fram av FS 033/12.

Formannskapet i Radøy - 008/2018

FS - handsaming:

Vidar Grindheim (H) stilte spørsmål om han er ugild i handsaminga i denne saka, ettersom han er tilsett i Industriutvikling Vest, eit selskap som mottok kommunalt tilskot frå Radøy kommune. Formannskapet erklærte Grindheim til å vera habil til å delta i handsaminga.

Økonomisjef Sveinung Kvamme orienterte i saka. Næringsfondet står i dag med ca 2,7 mill. kroner. Rådmannen legg til grunn at det aller meste av nærings- og infrastrukturfondet vil verta nytta til planarbeid Manger senter og tilrettelegging på Olsvollstranda, for å sikra vidare utbygging av industriområdet.

Kenneth Taule Murberg (H) skisserte ei mogleg løysing med å setja av ein pott på t.d. 50.000 - 100.000 kroner av næringsfondet, som vert tildelt aktuelle søkjarar etter utlysing. Økonomisjefen peika på at det ved ei utlysing av næringsfonds-midlar vil vera behov for ei endring av reglementet for bruk av næringsfondet.

Formannskapet vedtok samrøystes rådmannen sitt framlegg til vedtak.

FS - vedtak:

Retningslinene for næringsfondet vert ståande uendra, slik dei går fram av FS 033/12.

Radøy kommune

Saksframlegg

Saknr	Utval	Type	Dato
009/2018	Formannskapet i Radøy	PS	25.01.2018
	Kommunestyret i Radøy	PS	

Sakshandsamar	Arkivsaknr.:	Dokumentnr.:
Arthur Kleiveland	16/4	18/1046

Rullering av ROS-analyse - 2018

Saksopplysingar:

Rullering av ROS-analyse tek utgangspunkt i vedteken analyse frå 2014 og akseptkriteria som vart godkjent då.

Arbeidsgruppa si vurdering ligg som vedlegg til saka. Analyse sine resultat er sett opp i ei matrise som syner hending, trend, kva område som vert råka, og sannsyn- og risikotabell. Matrise ligg ved saka.

Rådmannen sitt framlegg til vedtak:

Rullert ROS-analyse vert godkjent.

Formannskapet i Radøy - 009/2018

FS - handsaming:

Det vart påpeika feil i ROS-analysen, og rådmannen sa at dette vil bli retta opp til saka kjem til handsaming i kommunestyret.

Formannskapet vedtok rådmannen sitt framlegg til vedtak.

FS - vedtak:

Rullert ROS-analyse vert godkjent.

Vedlegg:

Samfunnsdelen ros 2017

Rosanlyse matrise 2017

Radøy kommune

Saksframlegg

Saknr	Utval	Type	Dato
010/2018	Formannskapet i Radøy	PS	25.01.2018
	Kommunestyret i Radøy	PS	

Sakshandsamar	Arkivsaknr.:	Dokumentnr.:
Lisbeth Toppe Alvær	17/1096	18/881

Mulighetsstudie Manger rådhus og Prestegarden

Saksopplysingar:

Bakgrunn

Og arkitekter AS leverte i oktober 2017 rapport frå ein mulighetsstudie for rådhuset og Prestegarden (med uteområder) på Manger. Å vurdere korleis ein kan utnytte rådhuset når rammebetingelsene vert endra i samband med etablering av Alver kommune, er eit viktig tiltak i eit tettstadsutviklingsperspektiv. Sjølv om lokalisering av tenester i nye Alver kommune førebels ikkje er klar, er det grunn til å tru at sentraladministrative tenester som i dag er lokalisert på rådhuset, vert flytta frå Manger. Studien er utført på oppdrag frå rådmannen og i all hovudsak finansiert av tilskotsmidlar til tettstadsutvikling fra Hordaland fylkeskommune (HFK). HFK helsa studien velkomen, og viser til at utfordringa med «å fylle tomme» rådhus ville vere aktuell for fleire kommunar i åra som kjem.

Og arkitekter AS har i studien skissert muligheten for å bygge om rådhuset til eit kulturhus med eit oppgradert uteområde. Studien konkluderer med at rådhuset toler ombygging og at det er relativt stor grad av fleksibilitet med omsyn til utforming av bygg og uteområdet. Biblioteket, som i dag er lokalisert på Radøy ungdomsskule, er peika på som ein sentral premiss i framlegget om å bygge om rådhuset til kulturhus. Ved å samle kulturelle aktivitetar og tenester kan samspelet mellom desse gi lokalsamfunnet eit spennande kulturtilbod, og skape aktivitet i lokaler som står i fare for å verte tomme. Samstundes vert det lagt til rette for aktivitet i bygget både på dagtid og kveldstid.

Studien frå Og arkitekter AS bygger delvis på tidlegare mulighetsstudie for Manger, utført av CUBUS Arkitekter i 2015. I CUBUS arkitektene sitt arbeid vart også Prestegarden og Prestegardshagen sentralt på Manger identifisert som viktig. Og arkitekter AS konkluderer med at mulighetene for arkitektonisk endring på Prestegarden er meir avgrensa, mens uteområdet vert peika på som eigna for utvikling og tilrettelegging for auka aktivitet.

Ein mulighetsstudie handler om å identifisere eit mulighetsrom, og Og arkitekter AS har i sin studie skildra og visualisert desse mulighetene. Når mulighetsstudien no ligg føre, er det behov for ei politisk avklaring om rådmannen skal arbeide vidare med prosjektet. Formannskapet har vore fortløpande informert om prosjektet, og prosjektet er lagt inn i økonomiplanen med løyving i 2019 og 2020.

Vurdering

Rådmannen legg til grunn Og arkitekter AS si vurdering om at rådhuset har eit betydeleg potensiale for ombygging, både arkitektonisk og bygningsteknisk. Det er med andre ord grunn til å tru at ombygging kan gjerast med eit godt resultat. Sjølv om det er gjort ei overordna vurdering av om at bygget kan byggast om og nyttast til andre tenester, vurderer rådmannen at det er naudsynt å gjere nærare undersøkingar av både funksjonelle løysingar og kostnadsbilete Dette er særskilt viktig ettersom det er ulike funksjoner som bibliotek, musikk og kulturskule, kino, kafeverksemd og frivilligsentral, som er tenkt å utøve sine tenester i eit tett samspel.

Det er sett av totalt kr 10 000 0000 til prosjektet i økonomiplanen for åra 2019 og 2020. Den økonomiske ramma for prosjektet er eit anslag på eit tidleg tidspunkt i prosessen, og endeleg kostnad vil vere avhengig av kva type løysingar kommunen går for. Eit forprosjekt vil kunne reduserer risiko i prosjektet og gir større sikkerhet for kostnadsnivå før endeleg politisk vedtak om evt. gjennomføring.

Lokalisering av biblioteket er eit anna viktig premiss i vurderinga om rådmannen skal arbeide vidare med framlegget om å etablere kulturhus i rådhuset sine lokaler. Mulighetstudien illustrerar på ein god og spennande måte korleis eit moderne bibliotek kan utformast i rådhusets lokaler. Etter rådmannens vurdering vil synergieffekten og kraften i eit framtidig kulturhus falle bort, dersom ikkje biblioteket vert lokalisert i kulturhuset.

Studien er sendt Fylkesbibliotekssjefen i Hordaland som uttaler følgande:

«Folkebiblioteka har dei siste åra gjennomgått svært store endringar både når det gjeld tenester og funksjon. Dei har endra karakter frå å vere boksamlingar til å drive aktiv formidling og bli levande litteratur- og debatthus. Endringa vart stadfesta med endringar i Biblioteklova frå 1. janar 2014. Ein må ha dette i minne når ein skal vurdere eigna lokale for biblioteket på Manger. Ved at folkebiblioteka sitt samfunnsoppdrag er endra, er behov for lokale og plassering av biblioteket også endra. (...) Det er positivt å nytte biblioteket for å skape liv og aktivitet i denne delen av sentrum, men biblioteket aleine kan ikkje klare dette. Samlokalisering med andre tenester som t.d. kulturskule er derfor truleg eit premiss for å få dette til, og ein bør halde fast med dette.»

Det er enighet om at dagens bibliotekslokaler, pga. storleik og tilgjenge, i avgrensa grad er eigna til å ivareta dei nye krava til folkebiblioteket. Det er likevel uttrykt betydelig skepsis frå bibliotek mot å flytte aktiviteten til rådhuset. På eit overordna nivå er bekymringane i hovudsak relatert til avstand frå Grønålen kor det i dag er stor aktivitet blant barn, unge og vaksne, rolla som skulebibliotek, arealbehov og universell utforming. Frå biblioteket sin side har Rema 1000-bygget på Manger har vore framheva som eit foretrukket alternativ, både pga. avstand til barn og ungdomsaktiviteter i Grønålen-området og annen aktivitet i Manger sentrum, og pga. storleik og utforming av lokaler.

Fylkesbibliotekssjefen uttaler at *«Etter fylkesbiblioteket si vurdering kan Rådhuset på Manger fungere som biblioteklokale, men med ein del atterhald:*

- Det er i samlokalisering med andre tenester at biblioteket kan bidra til liv i huset, og i denne delen av sentrum. Det er derfor viktig at ein heldt fast med dette.*
- Biblioteket har behov for eit lokale på 600m2, som stadfesta i mulighetsstudien.*
- Bærekonstruksjonar i bygget bør tillate at biblioteklokalet kan vere eitt ope rom og ikkje inndelt i fleire mindre rom.*
- Ideelt, bør biblioteket vere nærare barn og unge sine aktivitetar på Manger.*
- Biblioteklokalet bør vere på eitt plan, men kan fungere på to. Kjellarlokalet bør ikkje nyttast til bibliotek.*
- Biblioteklokalet bør vera eigna for arrangement og ein bør tenke på støyisolering mot andre tenester.*
- Kafeen i 1. etasje bør vere ein del av biblioteket, gjerne i samdrift med andre tenester.*
- For at biblioteket skal kunne vere meirope, må det vere mogleg å stenge av lokalet frå andre tenester i bygget. Samstundes må det kunne vere tilgjengeleg utanom bemanna opningstid*

Med omsyn til avstand til Radøy ungdomsskule, som vil miste skulebiblioteksfunksjonen slik den er i dag, meiner rådmannen at avstanden mellom skulen og rådhuset er innanfor forsvarleg lengde. Også rektor ved Radøy ungdomsskule uttrykker at dersom biblioteket vert flytta, vil det vere mogleg å finne andre løysingar for samspel mellom skule og biblioteket.

Konklusjon

Mulegheitsstudien har lagt fram spennande forslag om korleis rådhuset kan nyttast vidare, men har også bragt på banen ei rekke spørsmål knytt til kostnad, praktiske løysingar osb. På bakgrunn av ei

heilskapleg vurdering meiner rådmannen det vil vere naudsynt å etablere eit forprosjekt i forlengelsen av mulighetsstudien for rådhuset. Forprosjektet kan avklare, konkretisere og kvalitetssikre prosjektet, før den vert lagt fram for politisk handsaming. Ettersom utvikling av Gamle prestegarden og prestegardshagen i større grad har karakter av å vere rehabilitering utan prinsipiell betydning, meiner rådmannen at dette arbeidet kan starte på noverande tidspunkt. Det er sett av midlar til dette arbeidet i inneverande år.

Rådmannen sitt framlegg til vedtak:

Rådmannen går vidare med utvikling av rådhuset som kulturhus, slik det er skissert i rapporten frå mulighetsstudien, ved å gjennomføre eit forprosjekt som grunnlag for sak til politisk handsaming. Arbeidet med oppgradering av Prestegarden og Prestegardshagen vert gjennomført i tråd med budsjettløyving i 2018.

Formannskapet i Radøy - 010/2018

FS - handsaming:

Rådmann Jarle Landås orienterte om mulegheitsstudien og peika på at studien viser skisser for korleis det kan vera mogleg å utvikla og utnytta rådhuset og Gamle prestegarden/prestegardshagen, og området knytt til desse bygningane. Rådmannen understreka at dette er skisser som må følgjast opp med eit forprosjekt, dersom dette er ei prioritert oppgåve politisk.

Kenneth Taule Murberg (H) ser ikkje noko poeng i å flytta biblioteket frå "ein utkant til ein annan". Han meiner det er gunstig å plassera biblioteket i sentrumskjerna, for å styrka sentrum på Manger. Om rådhusbygget er tiltenkt som kulturbygg, så meiner Murberg det t.d. kan vera fornuftig å flytta ungdomsklubben hit. Han gav uttrykk for stor skepsis til ein mogleg kafe her.

Jostein Borlaug (AP) peika på at Manger ikkje er større enn at det må vera mogleg å drøfta om biblioteket kan leggst til rådhusbygget.

Vidar Grindheim (H) advara mot at rådhuset blir brukt til utleige til private aktørar.

Ordførar Jon Askeland meiner det er riktig å gå vidare med eit forprosjekt, der også lag, organisasjonar og bygdefolk får koma med sine innspel til bruk av rådhuset og Gamle prestegarden/prestegardshagen. Han ser gode moglegheiter for å utvikla det aktuelle området.

Rådmann Jarle Landås sa at det vil vera nødvendig med ekstern konsulenthjelp i arbeidet med eit forprosjekt, og at det er naturleg at formannskapet vil bli styringsgruppe for forprosjektet.

Formannskapet konkluderte med at denne saka på dette stadiet ikkje skal vidare til handsaming i kommunestyret.

FS - vedtak:

Rådmannen går vidare med utvikling av rådhuset som kulturhus, slik det er skissert i rapporten frå mulighetsstudien, ved å gjennomføre eit forprosjekt som grunnlag for sak til politisk handsaming.

Arbeidet med oppgradering av Prestegarden og Prestegardshagen vert gjennomført i tråd med budsjettløyving i 2018.

Vedlegg:

Uttale om Radøy bibliotek i mulighetstudie for Manger
Uttale om Radøy bibliotek i mulighetstudie for Manger
Radøy bibliotek i Rådhuset på Manger Notat
Radøy bibliotek - utkast strategiplan (3)

Radøy kommune

Saksframlegg

Saknr	Utval	Type	Dato
011/2018	Formannskapet i Radøy	PS	25.01.2018

Sakshandsamar	Arkivsaknr.:	Dokumentnr.:
Arthur Kleiveland	18/19	18/71

Meldingar og referatsaker

Saksopplysingar:

Det vert lagt fram følgjande meldingar og referatsaker:

- Regionrådet Nordhordland – protokoll møte 8. desember 2017
- Vidareføring av samordningsforsøk med statlege motsegner – Kommunaldepartementet
- Sambandet Vest – protokoll ekstraordinær generalforsamling 19. desember 2017
- Høyring – kravet til leveringspliktige posttenester – forslag til endring av postloven
- Prosjektmandat – vassleidning Austmarka-Storsandvik
- Prosjektmandat – Manger skule utbygging
- Orientering om brann og redning
- Orientering om sjukefråversprosjekt
- Orientering frå ordførar
- Orientering frå rådmann

Rådmannen sitt forslag til vedtak:

Meldingar og referatsaker vert tekne til orientering

Formannskapet i Radøy - 011/2018

FS - handsaming:

Postombering - høyring: Samferdselsdepartementet har sendt på høyring eit forslag om å endra omdelings-frekvensen for post.

Formannskapet oppmodar eldrerådet og råd for menneske med nedsett funksjonsevne om å koma med innspel som i neste omgang kan leggst til grunn i ein uttale frå formannskapet.

Prosjektmandat: Det er utarbeidd prosjektmandat for vassverksleidning Austmarka-Storsandvik og for Manger skule. Rådmann Jarle Landås peika på at dette er rehabiliteringsprosjekt, og difor etter reglement for byggenemnda ikkje skal til uttale i nemnda - sjølv om dette er prosjekt til meir enn ein million kroner. Rådmannen oppmoda politikarane om å gje tydeleg tilbakemelding dersom dei likevel ønskjer prosjekt overført til byggenemnda.

Brann og redning: Kommunalsjef drift og forvaltning, Lisbeth Alvær orienterte om status for brannvernet i Radøy og utfordringar dei står overfor framover. Brannsjefen har uttrykt bekymring knytt til beredskap på dagtid. Det blir også stilt stadig større krav til kompetanse. Samtidig understreka kommunalsjefen at brannvernet i Radøy gjer ein god jobb.

Kommunalsjefen orienterte også om Arbeidstilsynet sine krav til utbetringar på brannstasjonen etter

tilsyn i brannvernet. Ein konsulentrapport frå Sweco viser at det er nødvendig med omfattande tiltak for å innfri Arbeidstilsynet sine krav. Kommunalsjefen sa at det blir jobba med strakstiltak i 2018, men at det også blir sett igang arbeid med å finna ny lokale til brannstasjon.

Kommunalsjefen trekte også fram arbeidet med ny brannordning samarbeidsmodell for Nordhordland brann og redning.

Ho orienterte også om "first responder"-bil til brannvernet, som er eit verbalpunkt i 2018-budsjettet. Dette kjem opp som eiga sak seinare.

Sjuefråver: Kommunalsjef Mette Fauskanger orienterte om det relativt høge sjuefråveret kommunen og tiltak som blir gjort for å få fråveret ned. Det har vore gjort medarbeidar- og arbeidsmiljøundersøking i fleire av tenestene, som vil bli følgd opp med aktuelle tiltak. Kommunalsjefen peika mellom anna på at det mellom anna blir sett fokus på leiarrolla, og at leiarressursen enkelte stader er auka.

Bustadsosial handlingsplan: Kommunalsjef Mette Fauskanger opplyste at utkast til bustadsosial handlingsplan skal vera ferdig om kort tid. Ho sa også at det vert jobba intenst med kommunedelplan for helse og omsorg.

Kommunedelplan Bø: Leiar teknisk forvaltning, Tonje N. Epland, orienterte om status og framdrift for aktuelle arealplanar, med særleg fokus på kommunedelplan for Bø. Epland peika på motsegner og innspel som er kome til planen. Fylkesmannen har varsla motsegn på fleire punkt, knytt til plankrav, bruk av strandsone/naust og ROS/KU ny arealbruk/strandsone. Statens vegvesen krev meir fokus på trygg skuleveg og byggegrense på 60 meter av omsyn til framtidig utviding av fylkesvegen. Fylkeskommunen har varsla motsegn knytt til mellom anna kulturminne.

Leiar teknisk forvaltning informerte også om ei rekkje innspel frå Bø-sokna. Eitt innspel som er underskrive av ialt 120 personar, krev utvida arealgrenser for kommunedelplan-området. Dersom plangrensene blir endra, vil det i praksis innebera at planarbeidet blir stoppa og prosessen må startast på nytt.

Etter ei drøfting konkluderte formannskapet med at planarbeidet held fram innanfor opptrekte arealgrenser og prosedyrar for saksbehandling.

Planstrategi: Rådmann Jarle Landås orienterte om status for planstrategien og gjennomføringa av aktuelle planar. Han peika på at det viser seg nærast umogleg å få inn kortvarige planressursar. Rådmannen informerte om at vert prøvd å få i stand eit plansamarbeid med Lindås kommune knytt til t.d. områdeplan for Manger.

Ordførar Jon Askeland ber rådmannen leggja fram ei meldingssak i kommunestyret om status og framdrift i planarbeidet.

Ny kommunalsjef: Rådmann Jarle Landås orienterte om at Grethe Herøy har tatt i mot stillinga som kommunalsjef for helse og omsorg. Ho overtek for Mette Fauskanger, som i februar sluttar i Radøy kommune.

Solhall-bygget: Rådmann Jarle Landås opplyste at Radøy kommune førebels ikkje har kjøpt Solhall-bygget på Manger (tidl. DPS-bygget). No manglar berre underskrifta til Helse Bergen før overtakinga er i hamn.

Tingstova: Rådmannen orienterte om dialogen med Manger bygdelag om kommunal overtaking av Tingstova på Manger. Det blir jobba med ein kontrakt for overtaking, og denne vil bli lagt fram i formannskapet. Det er meininga å bruka Tingstova til vigsle i kommunal regi.

Skageneset: Ordførar Jon Askeland orienterte om BOF sitt omfattande restaureringsarbeid på hus og uteområde i Skageneset.

Tannklinikk: Ordføraren opplyste at fylkesmannen har bede om eit møte om framtida til tannklinikken på Manger.

Brøyting: Kirsti Gjetle Floen (A) og Vidar Grindheim (H) sa at dei har fått klagar på brøyting av kommunale vegar. Rådmann Jarle Landås svara at det ved stort snøfall er utfordrande å rekka over alle vegar raskt. Han ser det som viktig å få tilbakemeldingar, som kommunen kan ta opp med entreprenørane.

Formannskapet tok meldingar og referatsaker til orientering, med tillegg sett fram i møte.

FS - vedtak:

Meldingar og referatsaker vert tekne til orientering, med tillegg sett fram i møte.

Vedlegg:

Protokoll Regionrådet 3-2017 8. desember

Statlege motsegner_Vidareføring av samordningsforsøket som fast ordning_KMD

Sambandet Vest - protokoll ekstraordinær generalforsamling 19_des_2017

Høyring om endringar for omdelingsfrekvens av post

høyringsnotat Posten - færre leveringsdagar

Prosjektmandat - VL Austmarka - Storsandvik 170118

Prosjektmandat Manger skule utbygging

Radøy kommune

Saksframlegg

Saknr	Utval	Type	Dato
012/2018	Formannskapet i Radøy	PS	25.01.2018

Sakshandsamar	Arkivsaknr.:	Dokumentnr.:
Anne Dahle Austrheim	18/54	18/374

Serveringsløyve - Pizzeria Manger Kadir Yildiz

Saksopplysingar:

Bakgrunn

Radøy kommune mottok den 05.01.18 søknad om serveringsløyve frå Pizzeria Manger Kadir Yildiz. Verksemda er eit enkeltpersonsføretak der innehavar er Kadir Yildis og dagleg leiar er Serpil Kayhan. Serpil Kayhan er og styrar for serveringsløyvet.

Pizzeria Manger Kadir Yildiz ønskjer serveringsløyve i lokale i Idrettsvegen 7, 5936 Manger. Lokalet er 64,7 m2 stort og har 12 sitjeplassast. Pizzeria Manger Kadir Yildiz leigar lokalet hjå Oddmund Kvalheim.

Søknaden har vore til uttale hjå Vest politidistrikt, Nordhordland kemnerkontor og Skatt vest og dei har ingen merknader til søknaden. Søkjar har og sendt søknad til mattilsynet og den er under handsaming hjå dei.

Vurdering

I «Lov om serveringsvirksomhet» heiter det i §3:

Den som vil gjøre seg næring av å drive serveringssted må ha serveringsbevilling gitt av kommunen. Bevilling skal gis dersom kravene i §§ 4 til 6, jf § 7, er oppfylt, og det ikke foreligger forhold som av politimessige hensyn gjør det utilrådelig at serveringsbevilling gis. Bevilling gis til den for hvis regning serveringsstedet drives. Den gjelder for det serveringssted som er nevnt i bevillingen.

Dagleg leiar og styrar for serveringsløyvet er Serpil Kayhan, f. 01.02.73, han har bestått etablerarprøven etter serveringslova §5. Det er innhenta uttale frå politiet og skattemynde og dei har ingen merknader.

Opningstider kvar dag frå kl. 12-23.

Konklusjon

Serveringsløyve vert innvilga etter serveringslova §3, slik:

- Løyvehavar: Pizzeria Manger Kadir Yildis, Idrettvegen 7, 5936 Manger, org.nr. 917660603
- Dagleg leiar: Serpil Kayhan, f. 01.02.73
- Serveringsstad: Pizzeria Manger Kadir Yildis, Idrettvegen 7, 5936 Manger
- Storleik serveringsstad: 64,7 m2
- Tal sitjeplassar: 12

- Opningstid: kvar dag kl. 12.00-23.00
- Godkjenning frå mattilsynet må liggje føre

Rådmannen sitt framlegg til vedtak:

Serveringsløyve vert innvilga etter serveringslova §3, slik:

- Løyvehavar: Pizzeria Manger Kadir Yildis, Idrettvegen 7, 5936 Manger, org.nr. 917660603
- Dagleg leiar: Serpil Kayhan, f. 01.02.73
- Serveringsstad: Pizzeria Manger Kadir Yildis, Idrettvegen 7, 5936 Manger
- Storleik serveringsstad: 64,7 m2
- Tal sitjeplassar: 12
- Opningstid: kvar dag frå kl. 12-23
- Godkjenning frå mattilsynet må liggje føre
- Formannskapet føreset at løyvehavar innhentar løyve frå arbeidstilsynet og plan- og bygningsstyremaktene.

Løyvehavar pliktar å melda frå til kommunen dersom det skjer endringar i forhold til dei vilkår som er sett.

Formannskapet i Radøy - 012/2018

FS - handsaming:

Søknad om serveringsløyve for Pizzeria Manger vart lagt fram i møtet. Formannskapet godkjende å handsama søknaden som ekstrasak.

Formannskapet vedtok samrøystes rådmannen sitt framlegg til vedtak.

FS - vedtak:

Serveringsløyve vert innvilga etter serveringslova §3, slik:

- Løyvehavar: Pizzeria Manger Kadir Yildis, Idrettvegen 7, 5936 Manger, org.nr. 917660603
- Dagleg leiar: Serpil Kayhan, f. 01.02.73
- Serveringsstad: Pizzeria Manger Kadir Yildis, Idrettvegen 7, 5936 Manger
- Storleik serveringsstad: 64,7 m2
- Tal sitjeplassar: 12
- Opningstid: kvar dag frå kl. 12-23
- Godkjenning frå Mattilsynet må liggje føre
- Formannskapet føreset at løyvehavar innhentar løyve frå Arbeidstilsynet og plan- og bygningsstyremaktene.

Løyvehavar pliktar å melda frå til kommunen dersom det skjer endringar i forhold til dei vilkår som er sett.